



Ilinniagaqarnersiutit pillugit nalunaarutip allannguutissaatut siunnersuummik kingusinnerpaamik UKA 2019 sioqqullugu saqqummiusseqqullugit Naalakkersuisut peqquneqarnissaannik Inatsisartut aaliangiiffigisassaattut siunnersuut. Taamaalilluni ilinniartup ilinniarluni aallartinnermi kingorna, akiliunneqarluni angalasinnaatitaanini siulleq juullimi imaluunniit aasakkut atuangiffiup nalaani atussanerlugu nammineerluni aaliangersinnaaleqqullugu.

(Inatsisartunut ilaasortaq Peter Olsen, Inuit Ataqtigiit)

(Siullermeerneqarnera)

Ajorpoq Inuit Ataqtigiit uunga siunnersuumminnut tunngatillugu misissuilluarpallaarsimangimmata. Misissuilluarsimanginnerup kinguneranik ullumikkut suliarilerparput siunnersuut affaa eqqarsaatigalugu siunnersuuteqartup kissaateqarneratut ingerlareersoq.

Ajornangereerpoq ilinniarnep aallartinneraniit aasakkut feeriarnermi siullermi akiliunneqarluni angalasinnaaneq. Taamaattumik siunnersuummi tassunga tunngasortaa isummersorfiginianngilara, taamaakkaluartorli Inuit Ataqtigiit kaammattorusuppakka siunnessami siunnersuuteqartigatik pissutsinik misissuilluaqqaartassasut.

Tamatuma kinguneranik siunnersuut isummerfigisussanngorparput ilumut ilinniartut ukiumoortumik akiliunniunneqarlutik angalasinnaanertik ilinniarnep aallartinnerata kingorna juullisoriartornissaminnut siullermut atorsinnaaneraat.

Maluginiagara siulleq tassaavoq ilinniartut qitornallit ukiumoortumik akiliunniunneqarlutik angalasinnaanertik ilinniarnep aallartinnerata kingorna juullisoriartornissaminnut siullermut atorsinnaareeraat.

Tamatuma saniatigut Demokraatini malugaarput, akiliunneqarluni angalanissamut malittarisassat maannakkut atuuttut ilusilersorneqarnikuusut kalaallinut ilinniartunut siunnersortit innersuussinerat tunngavigalugu, taakkulu oqaatigisimagaat akiliunneqarluni angalasarnerit ilinniarnep aallarteqqaarnerani pisartut, ilinniarnep kipitiinnarneranut pissutaaqataasartut. Allatut oqaatigalugu immikkut ilisimasallit oqaatigaat, ilinniartut sulii amerlanerit ikerinnakkut ilinniarunnaartalissasut akiliunneqarluni angalasinnaatitaaneq ilinniarnep aallartisimatsiarnerata kingorna juullisoriarnermut atornqartassappat.

Demokraatini kissaatigeqaarput inuusuttut sulii amerlanerujussuit ilinniagartuunngortassasut taamaattumillu sulissutigisariaqarparput ikerinnakkut ilinniarunnaartartut sapinngisamik ikinerpaajunissaat. Una siunnersuut kalaallinut ilinniartunut siunnersortit innersuussutaat tunngavigalugu, aqqaataassaaq ilinniartut sulii amerlanerusut ikerinnakkut taamaatiinnartalernissaannut.



DEMOKRAATIT
DEMOKRATERNE

Tamanna Demokraatini tapersorsorsinnaangilarput taamaattumik tamanna tunngavigalugu inassutigaarput siunnersuut itigartinneqassasoq.